

MANIFEST NOVOG PUTA ZA EVROPSKU BOSNU I HERCEGOVINU

U ovoj 2010. godini, kao i u dvadeset godina koje su joj prethodile, Bosna i Hercegovina prolazi kroz jedan od najmračnijih i najstrašnijih perioda u svojoj istoriji. Preživjela je krvoproliće, ali ideologije koje su ga izazvale i njihovi nosioci još su na vlasti. Rat je, pod pritiskom međunarodne zajednice, završen, ali međuetnički sukob nastavljen je drugim sredstvima. Institucionalno ga potpiruju oni koji, nemajući šta drugo da ponude glasačima, tvrde da zastupaju interese narodâ i da govore u njihovo ime. Njihova politika je politika straha. Njihovi motivi - lična materijalna korist. Njihov jedini politički program - generiranje mržnje i nepovjerenja koje će potvrditi njihovu neophodnost kao zaštitnika svojih naroda.

Mi, članovi Naše stranke, smatramo da borba za našu domovinu još uvijek traje, i da će konačni pobjednici u toj borbi biti građani BiH - sigurne, moderne i evropske.

Vrijeme ratničkih etno-politika i političkog kriminala je prošlo. Dolazi bolje vrijeme. Naše vrijeme - vrijeme napretka, demokratskih i integrativnih politika. Mi možemo i moramo ispraviti moralnu kičmu i reformirati sadašnji sistem društvenih vrijednosti. Samo zajedno i solidarno možemo se izboriti za pravnu i pravednu državu.

Mi, članovi Naše stranke, okupili smo se jer vjerujemo da su čovjekovo dostojanstvo, njegova sloboda i njegovo pravo na traganje za srećom nepovredivi i neotuđivi.

Naš cilj je da osvojimo političku vlast i pružimo građanima BiH jednako pravo na obrazovanje, rad i svima dostupnu zdravstvenu zaštitu, izgradimo ekonomiju koja će vrijednovati rad, znanje i lično zalaganje i koja će našim potomcima ostaviti u baštinu našu zdravu i lijepu prirodu.

Mi ćemo vrednovati znanje, a ne porodične veze, rad, a ne stranačku podobnost. Svoje ćemo predstavnike držati odgovornima za obećano i sankcionisati za neučinjeno.

Borit ćemo se za demokratsku državu koja niti jednog svoga građanina neće marginalizirati ili diskriminirati po bilo kojoj osnovi.

Borit ćemo se za reduciranje državnog aparata i za sankcionisanje neodgovornih vršilaca vlasti.

Borit ćemo se protiv sprege kriminala i politike, i za reafirmaciju državne brige za socijalno ugrožene kategorije stanovništva.

Borit ćemo se protiv političke zloupotrebe religije i klerikalizacije politike, protiv privilegija na osnovu ideološke i vjerske pripadnosti.

Borit ćemo se za pravnu državu, zasnovanu na principima pravednosti i podjednakog odnosa prema svima.

Borit ćemo se za državu koja postoji radi građana i služi građanima koji je finansiraju.

Borit ćemo se za društvo u kome je građanski aktivizam usmjeren na razvoj solidarne, altruističke, senzibilne zajednice.

Naši stranački interesi ne mogu i nikad neće biti iznad interesa građana koji su nas izabrali.

DRŽAVA BOSNA I HERCEGOVINA

Bosna i Hercegovina je demokratska, decentralizovana i sekularna država, svih svojih građana i svojih naroda Bošnjaka, Hrvata, Srba i ostalih.

Država, njeni organi i službeni predstavnici nikada i nigdje ne smiju favorizirati teizam ili ateizam. Pravo na vjeru i vjeroispovijest, na ateizam i agnosticizam je neupitno i neotuđivo pravo svakog građanina BiH.

BiH je decentralizovana država zasnovana na najnaprednijim evropskim načelima lokalne samouprave. Pripadnici lokalnih zajednica imaju neotuđivo pravo da se bave svim pitanjima koja se tiču njihovog kvaliteta života.

Država mora zaštititi sva individualna prava svakog svog državljanina i nikad ih ne smije podređivati pravima kolektiviteta niti relativizirati bilo kojim drugim principom. **Uz poštivanje građanskoga principa prava i sloboda, a uvažavajući historijske činjenice multietničnosti i multikonfesionalnosti, osobito kako su definirane u zaključcima ZAVNOBIH-a, država Bosna i Hercegovina se mora izgrađivati i na osiguravanju, poštivanju i zaštiti kolektivnih prava da bi se ostvarila njihova potpuna ravnopravnost do razine paritetnosti i institucionalne autonomije u demokratskoj realizaciji etničkih, religijskih, kulturnih, kao i svih drugih tradicija i svjetonazora koji su povijesno oblikovali i danas oblikuju državu BiH.**

Država Bosna i Hercegovina ne pripada ni političkim strankama, ni bogatim biznismenima, ni privilegovanim porodicama nego svim svojim građanima i narodima podjednako.

Ustav BiH se može mijenjati samo u skladu sa Ustavom i zakonom predviđenim procedurama, a nikad ne smije biti u suprotnosti sa međunarodnim konvencijama o ljudskim pravima i slobodama.

EKONOMIJA

Zalažemo se za ekonomiju koja otvara fabrike, zapošljava i pravedno vrednuje rad, talenat i znanje. To znači stvaranje povoljnog ambijenta za investicije i ekonomski rast.

Zalažemo se za ekonomiju koja će svakom zaposlenom građaninu BiH omogućiti da od svog rada dostojanstveno živi i prehranjuje sebe i svoju porodicu. Ekonomiju koja će svakoj narednoj generaciji građana BiH poboljšati kvalitet života .

Zalažemo se za ekonomiju zasnovanu na načelima slobodnog i ravnopravnog tržišta, dugoročnog i samoodrživog razvoja, usklađenu sa principima socijalne pravde.

SOCIJALNA POLITIKA

Solidarnost i socijalna sigurnost su preduslov za stabilnu i naprednu državu. Mi smatramo da socijalna politika naše zemlje mora biti proaktivna po stavu i preventivna po djelovanju, sa ciljem da građane što prije i lakše vrati u poziciju u kojoj im pomoć države više neće biti potrebna. Država BiH mora učiniti sve da svojim građanima sa invaliditetom omogući ne samo zdravstvenu i socijalnu brigu nego i, u skladu sa njihovim mogućnostima, produktivan i dostojanstven život.

Polazeći od osnivačkih principa Naše stranke, mi ćemo se zalagati za državu koja stimulira poduzetnike da otvaraju nova radna mjesta, za državu koja će svakom građaninu BiH obezbijediti pristup adekvatnoj zdravstvenoj zaštiti i koja će progresivnim poreskim sistemom pravednije rasporediti stečeno bogatstvo.

Mi vjerujemo da je smisao države i političke vlasti da obezbijedi najveću moguću dobrobit za najveći mogući broj svojih građana. U ostvarenju tog cilja mi sljedeća prava smatramo neupitnim:

- Pravo na izbor mjesta življenja
- Pravo na rad
- Pravo na stanovanje
- Pravo na zdravu ishranu
- Pravo na osnovnu zdravstvenu zaštitu
- Pravo na besplatno osnovno obrazovanje
- Pravo na dostojanstvenu starost

OBRAZOVANJE

Naša stranka smatra da je sadašnji sistem obrazovanja mladih neadekvatan vremenu i okruženju u kojem živimo i da je prioritet vlasti da ga reformiše i uvede školske programe bazirane na modernim, naučnim nastavnim metodama i sadržajima koji su pedagoški i stručno dokazani u svijetu.

Mi smatramo da su značajne i hitne investicije u obrazovanje neophodne kako bi naša zemlja iz sadašnje ekonomske i socijalne depresije krenula ka svojoj boljoj, evropskoj budućnosti.

Bosna i Hercegovina mora svojim mladim građanima pružiti adekvatno, moderno, obrazovanje koje će im omogućiti da se u ostvarenju svojih životnih ideala ravnopravno natječu sa svojim vršnjacima iz susjednih i evropskih zemalja.

Osnovu državnog obrazovnog programa mora činiti zajednički, opšti, dio programa koji će biti uspostavljen isključivo na modernim dostignućima psihologije, pedagogije i nastavne struke.

Osim psihološkog, pedagoškog i stručnog dijela, naše obrazovanje mora sadržavati i one komponente koji će izgrađivati karakter, moral i kritičku, humanističku i solidarnu svijest.

Država, u svim svojim odlukama i akcijama, a posebno u obrazovanju mora zadržati ideološku neutralnost. Uvođenje teizma ili ateizma u institucije obrazovnog sistema koje finansira država narušava tu neutralnost. **Obrazovni sistem na svim nivoima mora biti u potpunosti depolitiziran i oslobođen uticaja političkih, vjerskih i ideoloških društvenih struktura na sadržaj i metode nastavnog procesa.**

Posebnu pažnju u našem obrazovnom sistemu moramo posvetiti onima koji su posebno nadareni, natprosječno talentovani i vrijedni. Njima se mora omogućiti da svoje potencijale

maksimalno razviju na najbrži i najbolji način i u institucijama koje su za to adekvatno opremljene.

Obrazovni program mora bit fleksibilan.

On mora pomagati onima koji zaostaju i omogućavati brzi napredak onima koji to mogu postići.

Sloboda i autonomija univerziteta su aksiomi našeg svjetonazora i mi smatramo da oni predstavljaju nezaobilazni preduslov za izgradnju modernog i demokratskog društva kakvo mi zagovaramo.

Nauka i naučni metod moraju biti uključeni u rješavanje svih problema sa kojima se naše društvo susreće.

ZLOČINI I ZLOČINCI

Krivica za zločin genocida, ratne zločine i zločine protiv čovječnosti je isključivo individualna i nikad ne zastarjeva.

Zagovornici, nalogodavci i izvršioци zločina moraju i odgovarat će pred sudom za svoja nedjela.

Slavljenje ratnih zločinaca i njihovo maskiranje u “nacionalne heroje” je saučesništvo u zločinu koji su oni počinili.

Naša stranka je, i uvijek će, otvoreno i svom snagom stajati na strani žrtve i njenog prava na obeštećenje i uvijek će se boriti da počinioци zločina budu izvedeni i osuđeni pred pravednim sudom.

LJUDSKA PRAVA

Svi građani BiH su jednaki pred zakonom.

Država postoji radi svojih građana i građanki, i njemu i njoj mora da služi.

Ljudski život i ljudska prava su najviše vrijednosti našeg društva.

Diskriminacija bilo kojeg građanina BiH na osnovu njegove vjere, njegove nacije, njegove narodnosti, seksualnog opredjeljenja ili ideološkog pripadanja je napad na sve nas i na državu Bosnu i Hercegovinu.

Pravo na slobodno izjašnjavanje, odnosno neizjašnjavanje, po pitanjima pripadnosti rasi, vjeri, naciji, narodu i ideološkoj pripadnosti su neotuđiva i ne mogu se ograničiti ustavnim i zakonskim aktima BiH.

Svako uskraćivanje spomenutih prava imaće za posljedicu i moralnu i zakonsku odgovornost osporavatelja.

Mi vjerujemo da su sloboda misli, sloboda vjere, sloboda od bijede i sloboda od straha prirodna i neotuđiva ljudska prava.

BiH U EU

BiH je neodvojivi dio evropske civilizacije, a vrijednosti te civilizacije su neodvojivio dio BiH. **Zato je u BiH neophodno izgraditi zdravo društvo, snažnu ekonomiju i efikasnu državu.** Istorijski, geografski, kulturno, ekonomski i civilizacijski ne postoji niti jedan argument koji bi nadjačao ideju priključenja BiH Evropskoj uniji i evroatlanskim integracijama, a u cilju budućeg zajedničkog prosperiteta.

BiH će Evropskoj Uniji prenijeti hiljadugodišnju tradiciju i iskustvo jednog kulturnog prostora na kojem se vijekovima susreću različite religije, nacije, jezici, kulture, mentaliteti, običaji i tradicije.

BiH će od Evropske unije preuzeti standarde, efikasnost, uređen pravni sistem, zakonodavstvo, odgovornost nosioca vlasti, razvojnu ekonomiju, socijalnu osjetljivost, građanski aktivizam...

Naša stranka smatra evropsku integraciju najvišim interesom naših građana i naroda i po preuzimanju vlasti će svu društvenu energiju usmjeriti u transformaciju države i društva u pravcu dostizanja evropskog cilja.

PRVI KONGRES NAŠE STRANKE

Sarajevo, 17. 04. 2010. godine